

增補南嶽志二卷

第十六冊

南嶺山房

王香余題

民國十二年歲
癸酉寒月

增補南嶽志序

四嶽祀自虞廷五嶽見於詩禮明禋臍饗鉅典煌煌國有興廢禮
無因革也然從古帝王建都多在西北習居陸地號爲中原嵩華
恒岱皆與接壤惟衡嶽獨處南陬又有長江洞庭之隔巡狩省方
舟車並駕自軒轅氏以潯霍山爲之副至漢武南巡憚其遠阻竟
移其祀於潯山蓋本軒轅之制以副代正紫色奪朱鼃聲亂雅而
朱陵洞天祭禮中斷幾數百年然禹貢方域書衡陽荊州後漢郡
國志稱湖南侯國山海經云衡山一名岫嶺而翼軫分野祝融掌
官上考之經旁證之史通儒碩學盡辨其誣故雖漢武之雄才獨
斷能紊一日之典章未能掩萬古之耳目也遞至泥馬渡江宋室

南徙於是西北四嶽淪陷金遼巋然靈光衡山獨峙春秋享祀備極崇隆自時厥後歷朝無聞皆著爲典禮志則無聞自明嘉靖戊子衡山縣知縣安城彭簪創修衡嶽志八卷隆慶辛未湖廣學政秀水姚宏謨增補五卷共成十三卷清康熙甲辰衡山縣知縣閻中朱袞獨撰南嶽志一卷乾隆癸酉大興高自位與本縣翰林曠敏本重編南嶽志八卷雖踵飾增華代有作者而美善未盡海內無傳同治十一年南嶽廟燬光緒六年平江李方伯元度崛起任事湘中先達踊躍輸將數年之中盡復舊觀方伯故雄於文者遂以餘資重修南嶽志推廣至二十八卷自是山川之秀美文物之聲明燦然大備讀是書者雖阻跡數千百里之外如置身七十二

峰之閒朗若列眉瞭如指掌宜其不脛而走無翼而飛簞簞乎觀
止哉不幸往歲兵燹舊板灰燼通嶽廟年久蠹蝕將就傾圯於是
邑人王簡任香余追李公而繼起經年竣事又以餘資與同邑歐
陽明府謙重刻李書續修近事去歲_{嘉言}在京師被鄉人之舉董
修是役分夏至縣則書已告成受而讀之書止二卷而於四十年
閒事討論之嚴搜羅之富與李志如出一手閒亦有補李志所缺
漏者嘻文獻值隆替之交陵谷有升沈之感然則是書之續又烏
可以已乎時

民國十二年歲次癸亥夏五月衡山陳嘉言謹序

增補嶽志跋

南嶽之有志舊矣清同治朝廟燬於火越光緒五年平江李次青方伯修復之又五年告成乃重輯南嶽志一書搜羅弘富足爲名山生色顧是書之成距今四十年遊嶽者日多詩文亦日增且尙有李志所遺者邑人王君蘭軒歐陽君劭甫因李志板片無存覓得一冊重付剞劂而爲之增補其未備屬余編輯余查李志卷帙浩繁編次十四類釐爲二十六卷茲僅增上下二卷不復依李志名目首次詩皆以朝代爲先後錄釋子次之雜識又次之自是遂成完書矣蘭軒先生熱心毅力將殿柱槪易木爲石又嶽廟東角門災延及東廂興工竣事今復與歐陽君增補是書其亦可謂

有心人哉余因跋數語誌其緣起云衡山李子榮謹撰

增補南嶽志文集卷一

衡山

李子榮編次
鄭阜康參閱

王香余
歐陽謙

全輯

南朝

梁元帝御製衡山九真觀碑記

簫鼓騰空煙霞相接星辰奪采燈燭非明風牖雲梁千門萬戶樓
施九柱已同瀨鄉之地山帶五城復類玄洲之所玉版之經猶蘊
金丹之處存焉上月臺而遺愛登景雲而忘老欣欣然不知所以
而然日暉石瓦東眺靈壽之峰月蔭玉牀西瞻華蓋之嶺竹類黃
金旣歲蕤而防露木似紅蓮且紛披而拂日杯傳九醞隱綸之車
晨至堂開四扇西盈之鐘夜響

唐

王維送瑗上人歸衡嶽詩序

衡嶽瑗上人者嘗學道於五峰蔭松棲雲與狼虎雜處得無所得矣天寶癸巳歲始遊於長安手提瓶笠至自萬里宴居吐論緇屬高之初給事中房公謫居宜春與上人風土相接因爲道友伏臘往來房公旣海內盛名上人亦以此增價秋九月杖錫南返叩門來別秦地草木撼然已黃蒼梧白雲不日而見溟陽有曹溪學者爲我謝之

明

楊又玄祀南嶽記

洪武三年春天下羣臣來朝是時皇帝詔曰朕自起義以來每獲城池必祭境內山川尊崇匪懈邇者命將出師中原底平嶽鎮海濱悉在封域朕託天地祖宗之靈武功之成雖藉人力然山川之神實默相余於是親選敦樸廉潔之臣賜以衣冠俾齋沐端悚以俟臣又玄承詔唯謹以四月望授祝幣五月十七祭祠下威靈歆格祀事孔明礪石鐫文用垂永久惟神長養萬類奠於炎方典禮既崇綱維斯在尙祈陰陽以和風雨以時物不疵癘民庶乂安是我聖天子之所望於神明者而亦神明祚我邦家之靈驗也

曾朝節康時柄傳

公諱時柄號師泉姓康氏籍江右安福少與其弟孝廉時亨讀書

匡廬山中偶語寺僧云來自衡峰祝融者遂慨然作南嶽之游萬
歷己亥過衡山日著屐覽諸名勝餐風吸露翛然自得每至呼酒
題壁今辛丑旋里遇之岫嶠紫葢二峰間衣履欲仙讀其壁間詠
淡古曠遠字若縈髮類唐呂向連錦書公語余七二綿亘楚索雲
海盪漾吞不盡煙霞余曰煙霞君肺腑何處著口因大笑而別其
後翁往來仙人橋世傳橋畔巨石仙人鎮壓古井犁鋤不可動翁
晨夕嘯傲其旁旣而歎曰井之有無不可知仙得石以傳石卽仙
耳外此何求晚隱而不見或曰公吳產仍歸吳或曰否否公山水
人薄仕進若然吾將訪之岫嶠紫葢間矣

李拭香水庵佛閣碑記

衡盡南楚是維朱陵湘水東流任龍宮之吐納祝融北映來象域
之奔馳福地靈墟已備鷲嶺之二三玉牒金繩應開鹿苑者八九
矧夫石鼓峰翠噴天籟於層霄花藥雲深走錦屏於疊嶂自非寶
地香城幾負丹岑碧岫有純靈二僧者南陽浙邑人也積善高門
冥緣累世盃澄三江之霧杖棲五嶽之雲揮慧刃以斬邪關運靈
樞而闢仁路法流引海啟三藏之秘局長焰傳燈拯羣有之塗炭
于是聚礫延沙翹心淨土因之分條櫛理努力法門念三界罹崩
離之酷乃四天沈闇逆之悲仙露明珠騰漢廷而皈夢松風水月
照東國以流慈於是斧中巖以瑤構填下麓以瓊鋪晨鐘夕梵響
徹九嶷之巔慧日慈雲衣被五嶺之外更創傑閣用公金仙聿起

危樓爰貯寶相曩者紀綱廢墜妖災叢生毒龍塞赤縣之影匪惟
血落星隕醉象驅丹陵之風寧止石言鬼哭十年以來王風甫靜
千八百國佛日應懸殷宗奮鬼方之威適叶地水之卦周宣奏荆
蠻之績再賡常武之詩於斯時也丞相抗表而渡瀘卽見雍閭授
首將軍揚旌以過嶺旋看側貳歸心飛旄驚烏散之壘彼潁川永
昌之芳踪接踵而至帝璽耀昆明之水將金馬碧雞之荒裔稽顙
而來自此洞庭無波衡雲不閉鳳闕凌空拔迷途於火宅鸞拱礙
景朗正教於珠林煙霞之板蕩全收玉房跨霄漢而聳峙林壑之
交喪肇啟瓊臺乳雲氣以懸居

清

光緒御祭祝文

維光緒二十九年歲次癸卯三月丙辰朔越十四日己巳皇帝遣
湖南按察使黃建筦致祭於南嶽衡山之神曰維神崇標楚
望雄鎮荆揚應軫翼以儲精包沅湘而奠位助赤帝恢台之化宣
朱陵長養之仁岫嶠齊霄紀神圖於禹牒霍濟作輔列祀典於虞
封茲以朕慶展三旬歡臚萬姓敦厚允欽乎良德馨香虔達乎離
維治協衡平繪真形而宛在功德嶽峙孚裊對於時巡惟冀舒銀
編金簡之祥永承景貺協風穴雷池之應共迓昌期庶鑒精禋
用垂洪佑

宣統御祭祝文

維宣統元年歲次己酉壬申月戊申朔越二十八日皇帝遣頭品頂戴記名提督湖廣永州鎮總兵官張慶雲致祭於南嶽衡山之神曰維神秉精火德宅位炎方並翼軫以炳靈控衡荆而表峻玉書金簡瑞雲呈宛委之奇紫蓋朱陵初日紀芙蓉之勝茲以朕誕膺大寶篤念丕基虔舉隆文特申昭告勰祥符於離照光景常新奠重鎮於坤維蕃釐載迓神其鑒格式此馨香

袁奐歷代祀典攷

祀之有典也禮也禮曰名山大澤不以封天子祭天下名山大川五嶽視三公四瀆視諸侯似此則嶽爲名山匪諸侯之所得而有也顧云諸侯方祀又云諸侯在其地則祭之是嶽不爲諸侯所有

未始不爲諸侯所祭也諸侯而下及於大夫非其祀矣非所祀而祀之名曰淫祀此泰山之旅季氏所以貽譏也巡狩柴望有虞氏之典禮也漢武帝至南郡登天柱而望祭焉猶有巡狩之遺意也降而宣帝以使者持節往則天子躬祀之禮廢矣歲一禱三祠則五年柴望之禮廢矣故珪璋之沈瘞也自魏黃初始也遣百戶吏卒以奉事也自晉咸和始也牲用太牢羞用時穀禮用赤璋纁幣器用陶匏壇用茅蓆爵獻同於郊饌數依於社也自劉宋孝武始也嶽之封司天王也自唐天寶五載始也封號之進昭聖帝與景明后也自宋大中祥符始也革封號而止稱神也自明洪武始也祭祀之或遣太常或遣給事也自唐貞元宋建隆始也天旱則有